

WER AV
SGOTIST DE
RHO
SEINE WOR
LOT

















Ce 154.

C. 31.

~~574~~

Ce 454

Mis i Pentam. (m. Knpferts l. l.)

20. x. 93.

4°

K. - E.

E.



1, 12.5



N. Lupo ist die erste, gründliche
Anweisung.

Artickel der Ceremo
nien vnd anderer
Kirchen Ord
nung.

von Jo. 1625.





Vol 6. 1054



1054

In Gots gnaden wir Be
org zu Samland/ vnd Erhardt zu Pome
ran/ Bischoffe u. Embieten allen vnd yeglichen
vnnserer Bischthumben Chrißlichen gemeys
nen odder Kirchspilen/ vnd dynern derselbigen/ gnade vnn
fride ynn Christo vnnserm herrn vnnnd erzhirteen.

Lieben brüder/ dieweyl vns Ampes halben gebürt mit sor
gen zu wachen vnnnd aufzufehen / auff das geystliche regia
ment/ vnd guete ordnüg der Kirchen/ Welchs aber darynne
stehet/ das Gots wort rechtschaffen vnnnd zur besserung ge
prediget / vnnnd darauff andere eüsserliche Kirchen ordnung
formlich gefurt vñ gehalten werden. So verhoffen wir/ yhr
sollet alle neben vns den fleyß haben/ damit fur allen dingen
das theerr wort Gortis/ vns zu diesen ceyten gnediglich
vnd reychlichen von Gote vorlihen/ seynen gang habe vnd
fruchte bringe. Aber dieselbigen eüsserlichen kirchen Ordnung/
darynn denn durch geyz/ gleyßnercy vnnnd blindheit vil ver
kerter weyße eyn ceytelang eyngesurt seyn / nach dem wortte
Gotes ynn besserung zu stellen / Haben wir von ewern wes
gen/ vnnnd euch allen zu gut/ auff vns nemen müssen/ vnnnd
hierynne mit rathe vnserer mitbrüdere/ der prediger zu Kö
nigßbergk/ vnnnd bewegung aller vmbstende/ nach folgende
Ordnung begriffen / dieselben dem Durchleuchten hochge
bornen Fürsten vnd herrn/ herrn Albrechten/ Marggraffen
zu Brandenburgk/ ynn Preußen/ zu Stetyn/ Pommern/ der
Cassuben vnnnd Wenden Hertzog/ Burggraffen zu Thürma
berg/ vñ Fürsten zu Rügen/ vnserm gnedigsten herrn sampt
dem verordenten anßichus des ganzen fürstenthumbs/ auff
dem Landtag zu Königßberg ym December des fünffzehen
hundersten vñ fünffvndzwenzigsten yares gehalten / fur
getragen. Wie dann auch alsdann solche vnnsere Ordnung
eynheliglich / fur gut angesehen/ bewilligt vnnnd angenömen
ist. Nicht das hiemit sovil vnser ordnüg belanget der chriß
lichen freyheit zuentgegen eyniche nott odder gezwang ge
mache

A ij

macht/vnd also den gewissen/wie vormals durch menschen
sazung geschehen/stricke gelegt werden sollen/Sonder alley
ne das wir hierynne als durch eynn bürgerliche willkürliche
Ordnung/formlichen vnd ordentlichen / auch sovil es mög-
lichen eynerley weyse handeln vnd gebahren mögen/Angese-
hen das solche eüsserliche Cerimonien vnd geberde zum theyl
von vnserm heyland Christo selbst auffgesetzt/als nemlichen
die heyiligen Sacrament der Tauff vnd seynes leybs vnd blu-
tes zc. auch erzliche sonst ynn der schrift begründet als ehe/
vnd ehe scheydung/darynne dann ane das nymands anders
dann nach dem wortte zuhandelen macht hat. Zum theyl
aber eynes vnstrefflichen alten herkömens / vnnnd den kynd-
schen schwachen Christen / wie dann der merertheyl befund-
en wirt/ zu gutter eüsserlichen anreyzung dyenstlich vnnnd
notwendig seyn / vnd derhalben yhe nicht mügen gar verach-
tet vnnnd abgethan werden. Aber doch nicht sollen mit vn-
formlichen myßbrauchen behenget bleyben. Ist derwegen vn-
ser gütlichs begern vnnnd Christlich vermanung / wöllet zu
ehren dem göelichen wortte vnnnd Christlicher eynigkeit/ ynn
solche gute ordnung gutwilliglichen vnnnd eynmüetiglich
treten / vnd/wie vns der heyliche Paulus lernet/ yn allen dings
gen ordenlich gebahren.

Artickel der Ceremonien

vnnnd anderer Kirchen Ordnung.

Erstlichen damit die Biblische schrift so vil bekantter vn-
ter dem Christen volck werden müge / vnd sonderlichen die
yenigen/so yn künfftigen zeyeten prediger werden sollen/bey
der heyiligen geschriffte auffgezogen werden/soll die ganze
Biblische schrift yn Metten/Messe/vnd Vesper ordenlich
Capittel weyse eyngetheylt vnd gelesen werden an den orten
do man es süglichen thun kan/ den die anderen mögen nach
vormögen hynach greiffen. doch also das man etliche Capi-
tel/als von erzehlung der geschlechter/ader volcker/oder sonst
dergleychen

vergleychen ym alten Testament/so dem volck vndienstlich/
aussen lasse. Auch dieweyl solche Bücher noch nicht alle ynn
gut deütsch bracht seyn / muß man die weyl yn den yenigen/
so ym druck außgangen sein/sich üben bißsolang die andern
auch gefertiget werden.

Czum andern / dieweyl aber solche übung der heyligen
schrifte neben andern singen vnnnd lesen/welchs doch wenig
seyn sol. mehr dan ynn eynerley sprach gescheen kan/vnd be-
reyde alhie zu Königsberg/vñ vast an vilen orten der meh-
rer theyl solchs lesens vnd singens ynn Deütscher zungen/
damit sich es yederman am besten gebessern müge/ furgend-
men ist/bleybe es billich dabey das diese vnser gemeyne czun-
ge vornemlich hirynne gebraucht werde/als sonderlich was
die Capitel der schrift vnd gebet oder Collecten/auch hand-
delung vnnnd reychung der Sacrament belange. Was aber
Introite der Messe/ Et in terra. Sanctus. Agnus dei. vnd Re-
sponsoria zur Metten vnd Vesper seyn / dieweyl solchs al-
les vil noten hat/vnd das deütsche darvnder nicht formlich
nach vornemlich ist/mag man wol lateynisch bleyben lassen
Wider wo solche gesenge verzunde bereyde deütsch gehalten
werden / mit der czeit/ wo die lateynischen schulen daß ynn
den gang kömen/widder lateynisch halten/ denn auch Pau-
lus 1. Corint. xiiij. nicht weret ynn der Christlichen gemeyne
mit zungen zureden/ Vnnnd aber sonderlich diese lande vil
vndeutscher haben/ welchen man hirynne nicht wol anders
byenen kan / denn das man etwas lateynischs bleyben lasse/
damit doch yhr etliche auch yhren theyl an vnnsrem singen
vnd lesen verstehen.

Wir haben auch fur gut angesehen/ das man das latey-
nische psalliren nicht gantz abgehen lasse / yn sonderheit wo
bessere translation kömen würt / vnnnd die schulen ynn dem
schwang gehen.

Item man muß zu solchem singen vnnnd lesen bequeme
bücher/zu gemeynem gebrauch schaffen.

2 iij Von metten.

Von Metten.

Anzufahen wie gewöhnlichen Domine labia mea ꝛc. Lateynisch oder deütsch nach bequemtigkeit ane Venite vnd antiphonen vnnnd volgende zwoene oder drey psalmen- nach dem dieselben lang oder kurz/ ynn gewöhnlichem thon zusingen/ mit klaren vnderschiedlichen sillaben vnd worten.

Darauff sol der Caplan odder Pfarrer/ eyn gannts oder halb Capittel gegen dem volck deütsch vnd clar lesen / vnd nicht singen/ mit eyner gannts kurzen angehefften angevgg des vorstants vñ brauchs oder nutz es solcher gelesen schrifft vnnnd sollen solche Capitel ordentlichen nach eynander auff dem alten Testament vom anfang biß auff die Propheten genomen werden.

Darauff sal gesungū werden ein gewonlich Respons auß demselben buche der schrifft/ darauff man zurzeyt die Capitel liest/ vnd also bey yzlichem buch der schrifft/ eyn sonderlich respons gebraucht werden/ wie dann dieselben am ende verzeyhent seint.

Darnach singet der priester den versickel/ Erzeyge vns herr deyn barmhertzikeit/ mit antwort des Chors/ vnd beschleuß mit eyner deütschñ Collecten von der zeyt/ vnd gewonlicher Benediction wie am ende diser ordnung verzeyhent ist.

Item die Psalmen zur Metten sollen sein das erste teyl des Psalters biß auff Dixit dominus.

Item es wer förmlich das solche Metten alhier zu Königsberg ynn der Altenstadt etwas lenger auff den tag am werck tage gehalten würde/ als ym Sommer biß auff sechs vhren/ ym Winter biß auff sibē/ das die Lectien bald darauff folge vnd die gewonlichen deütschen geseng bald auff die Metten vom volck/ so sich vnder der Metten zur Lection versamelt/ angefangen würden.

Wir ermahnen

Wir ermanen euch aber sonst allenthalben / wo solche
deutsche Christliche gesenge noch nicht ynn übung seyne/
das yhr dieselben anrichten vnnnd lernen wöllet/wie man sie
dann beysamen gedruckt findet / denn sie vast besserlich vnd
Christlicher gemeyne gantz dyenstlich seyn.

Vesper.

Mit dem vers Deus in adiutorium/anzuheben deutsch
oder lateynisch nach Bequemigkeit/mit dem Gloria patri.

Bald darauff eynen psalmen/zweyne/odder drey/darnach
sie lang odder kurz sein/yn gewonlichem thon zusingen klar
vnd vornemlich/anzufahen vom Dixit dominus 1c.bis an
das ende des psalters/ane antiphen.

Darnach sol der diener eyn Capittel oder halbs/darnach
es lang oder kurz ist/auß dem alten Testament/ anzufahen
an den Propheten biß zum ende der bücher des alten Testa-
ments/zum volck laute lesen mit eyner kurzen declaracion/
wie oben yn der Metten/welche er von dem prediger vorhint
vorzeichnen sol/wo er anders selbst nicht genug vorstendig.

Darnach sol man das Magnificat deutsch singen/dar-
auff mit gewonlichem Versickel vnd Collecten/wie ynn der
Metten/sampt der Benediction beschliessen.

Von Collecten oder gemeynen gebeten.

Solche christliche Collecten oder gebete/zur Metten/Vesper
vnnnd auch zur Messen / das Jar vber zugebrauchen/seint
hynden an diese ordenüng ordenlichen nacheinander gesetzt.

Das Salue/wiewol es nu Christlichen geendert/vnd son-
derlichen das Rex regum/so man alhier ynn der Altenstade
nach dem beschluß der ampte zusingen pflaget/mögen wol
billich

Billich von kurtz wegen/ vnd sonderlichen dieweyl sich das Capitel etwas vortzeicht/aussgelassen werden.

Was man aber hierynnen anders halten sol auff erzliche fest/wirt vnden an seynem ort von den festen gemeldet.

Von Predigen.

Am ende der prediget des Sontags vnd Seyertags sol dem volck eyn gemyne Chrißliche beychte vor gesagt werden/wie dann geschickte prediger wol zuthun wissen. Aber von der eynfeltigen wegen auff dem lande / ist eyn sonderliche form gestelle/wie am ende dieser ordnung volgen wirt.

Auch sol alsdann / dem yungen volck das Vater vnser/ der glawbe / vnd gehen gebot furgesagt werden. Wo man aber auch nach mittag predige/geschicht es alsdan billicher/ dartzu dann mehr yunges volcks vnd dyenßboten zukommen pflegen.

Item es ist von nöten den vndeutschen yhre Tolkcn zu haben / welche so vorbyn an erzlichen ortten auß der Tafel wochentlich seynt bestelt/verzunde abgehen/diaweyl nymade nichts mehr ynn die Tafel gibe.

Von der Messe.

An welchen orten vñ kyrchen des Introitus halben nichts geendert / mag man die gewonlichen Sonteglichen Introit lateynisch behalten/ diaweyl es schrift ist/ Wo aber die Introit abgerhan seyn/ vnd deutsche Psalmen dafur gesungen werden/laß man es auch dabey bleyben/biß das man der außgerichtten Lateynischen schulen halben den Lateynischen Introit oder ganzen Lateynischen Psalm an die stadt ordnen wirt

Von dem Kyrieleyson ist fur gut angesehen/diaweyl es dreymal

Drey mal gesungen wirt das es yn dreyen Tzungen/wie man auch alhier pfleget/Krichisch/Lateynisch/vnnd deutsch gesungen werde.

Gloria in excelsis/vnd Et in terra/mögen deutsch odder Lateynisch nach bequemigkeit gesungen werden.

Die Collecten oder gebeth clar deutsch mit gewonlichem accent vnd nach ordenung der czejt.

Darauff zur Epistel sol der Priester eyn halb oder ganzs Capitel auß dem Newen Testament / yn Paulo anzufahen durch alle Episteln der Aposteln / vnnd Acta Apostolor/am Sonntag vnd Feyertagen/ wo es die menige der zuhörer fordert auff dem gewonlichen predigstuel/ An wercktagen aber vor dem Altar/gegen dem volck/wol laute/verstentlich vnd deutsch lesen/vnnd pronunciren ane accent/damit die wort so vil baß vernömen werden von den umbstendern.

Die Epistel am feyertage vom predigstul zu lesen wil sich am besten fügen das es eyn mitchelsser thu vnnd nicht der Messhaltent/Welcher nicht sonder verzug vnd stillschweygen zu dem predigstul kömen kund/Wo aber die Kirch kleyn odder sonst des volcks wenigk / ist nicht von noten auff den predigstul zugeen.

Volget Halleluia mit der Melodey gereymet auff den deutschen Psalmen so man darauff singen wil / wie dann alhier bereyt yn vbung.

Aber von sonderlichen festen/wirt vnden an seynem ort etwas sonderlichs angezeygt.

Darauff sal der diener odder priester ein ganz odder halb Capittel des Euangelions lesen/ anzufahen vom Matheo biß zum ende Johannis/mit der form vnd an den orten wie bey der Epistel gemelt ist.

Das Credo oder Symbolum sol der priester nicht/wie vor/
B anfahen/

anfahen / sonder es sol deütsch vom Chor vnnnd dem volck
gesungen werden.

Volge die Prefation / welche der Priester deütsch singet
sambe den Euangelischen worten der gebenedeyung odder
Consecration vber brod vnd weyn (den Offertoriū / Secretz
Canon minor vnd maior werden notwendig außgelassen)

Auff die volendeten Prefation vnnnd Consecration giße
man eyn czeychen mit der schellen / darnach so balde Eleuire
der püster beydeteyl des sacraments ane mittel nacheinander

Vnter des vnd so balde die Prefation sambe der Euang
gelischen Benediction auß ist / singet der Chor Sanctus
deütsch oder lateynisch nach gelegenheit / mit wenig noten.

Darnach so balde sol sich der Priester ob dem altar vmb
heren vnd das volck laut ansprechen mit solchen worten.

*vid. infra in
Formen
pag. a ij.*

Vorrede czum Vater vnser.

Laßet vnns hertzlichen bechen / daß Christus vnser herre
hat vns geheysen vnnnd selbst gelert zu bechen / Auch haben
wir gewysse zusagung vnser Gottis das er vns auß gnas
den vnd warheit / so wir bitten / erhören wil.

Volge das Vater vnser / Welchs der priester gegen dem
altar deütsch vnd wol vorstendiglichen mit der alt gewon
lichen nothen singen sol / Antwort der Chor / Sed libera re.
deütsch.

Balde darauff singet der Chor das Agnus dei / mit wenig
noten deütsch odder lateynisch nach gelegenheit / doch von
kürz wegen alleyn zweymal / damit die nachfolgenden Chri
stlichen gesenge der gemeyne so vil bas stad haben / vnd das
erste mahel mit dem Miserere nobis / Czum andern mit dem
Dona nobis pacem zubeschliessen.

Darauff

Darauff ane mittel wendet sich der Priester zum volck/
vnd gibe yhnen die Euangelische Absolution oder den Fryde
vnd singet deutsch Pax domini ꝛc. Antwort der Chor ꝛc.

Balde thut der Priester eyn kurze vormanung zu den
Communicanten/ so sich zuuor angeruegt/ vnd furhanden
seyen/ Wie den hiez zu eyn kurze form gestelt ist/ hynden an
dieser ordenung ende gesetzt.

Ane mittel darauff sol der priester erstlich reychen yglichen
yn sonderheit das brot vnd leyß Christi/ sagende/ Nym hyn
vnd yß/ das ist der leyß der fur dich gegeben ist/ darnach des
gleychen den kelch sprechende/ Nym hyn vnd trinck/ das ist
das blut das fur dich vergossen ist,

Vnder solchem Cömunicirn sol das volck mit dem Chor
singen das deütsch lied Ihesus Christus vnser heylant/ vnd
nach der Communication Got sey gelobet ꝛc

Darnach sol der priester mit eyner deütschen Collecten/
vnd gewonlichem segnen odder benediction beschliessen/ Wie
oben zur Metten vorgeychent ist,

In sonderheit von der Cömunion

Item am Sonntag vnd Feyrtag von wegen der Cömunia-
canten eyn ganze messe / wie oben vorgeychent/ zu halten.
Aber am werckentag / so nicht Cömunicanten furhanden/
mag mā sie singen biß auff die prefation/ welche aber sampt
den wortten der benediction des brots vnd weyns sol aussen
gleyben/ vnd alleyne das Vater vnser gesungen werden/ dar
auff Pax domini ꝛc. vnd ane mittel mit dem segnen beschloß-
sen/ denn die letzte Collect richet sich gewonlichen auff das
entpfangen Sacrament.

Item ann feyertagñ sol der diener alhir nach der Metten/
odder yn anderen flecken sonst zugelegner tzeit / der yeningen
so das hochwürdigde Sacrament. zuentpfahen gedencken/

B ij warten

11
warten sie kützlich vnderichten/vnnd widerumb sampt-
lichen vnd sonderlich nach gelegenheit hören zc. Wie denn
hier von am ende eyn form gestelt wirt,

Item Es sal niemant kömen das heylig Sacrament zu-
entpfahen er habe sich dan zuvor am feyertag/Wie yetz an-
gezeygt/odder am werckentage/sonst zu bequemer zeyt/dem
diener erzeygt/den diß Hochwirdig Sacrament nicht yn ge-
meyne vnder den hauffen zu werffen odder geben ist / wie
das wort odder predig/sonder alleyn den yeningen/so sich als
Christen beweyßen vnd mercken lassen.

Derhalben sollen die Cömunicanten zuvor yhren hunger
vnd durst auch glawben anzeygen,

Item man sol das volck ynn den predigen wol warnen
vnd vnderrichten/ das die yeningen/ so ynn offnen lastern ly-
gen/ on alle besserung / sich als die vnchristen dieses Sacra-
ments enthalten/ Derhalben auch die Cömunicanten eyn ey-
gen stelle vnnd orth nahent bey dem Altar haben sollen/ da-
mit sie von der ganzen gemeyne besichtiget werden / vn sich
nymant eyndringen müge/ denn so sich vorhyn erzeygt ha-
ben vnd zugelassen seyn.

Vnnd hiemit mag mit guter bescheydenheit widerumb
der weg zur rechten Christlichen excommunication mit der
der zeyt bereydt werden/ doch das hiyenne nichts furend-
men werde ane vorgehende warnung/ vnd das die gemeyne
mit dem diener das vrteyl felle.

Item es seynt etliche personen die nicht alleyne das göt-
lich wort fliehen/sonder auch verspotten vnd lestern/begern
dennoch gewaltig das Sacrament von den dienern/ Wol-
len aber nicht cyniche rechen schaffe geben yhres glawbens
odder besserung/ diesen sol man die fahr yhrer selen seligkeit/
vnnd das sie diß Sacrament zum verdammis genyßen/ an-
zeygen/vnd sie freuntlichen mit Gotis wort unterweyßen/
wil es nicht an yhnen helffen / ist yhnen das Sacrament
nicht zureychen.

Item es kömen

Item Es können alhier zu Königsberg/ vnd an etlichen andern orten/zu grossen festen/die vnderischen mit hauffen/ auch mit yungem gesinde/ begern alle des Sacraments/ vñ dringen sich eyn / diesen muß man eynen Tolcken bestellen/ der auff solche fest yhnen zuuor/ynn yhier zungen/gutten fleysigen bericht thu / auch darnach widerumb von yhnen bericht neme/das man wisse was sie suchen vnd glawben.

Von gefeßen des Sacraments:

Im Thumb/dergleychen yn der Altenstadt/alhier zu Königsberg/bedarff man ynn ygliche pfarie drey kleyne kelch/ zwene für die francken/von wegen etlicher vnreynen vñ vorlippender francken/ vñ den dritten kelch am Sonntag für die Cömunicanten,

Item In eyner yglichen genanten Pfarckyrchen eynen grossen kelch zu eynem stauff oder anderthalben auff grosse fest zur mennige des volcks zu brauchen/als auff Ostern/Pfingsten 1c. Doch zuuor hütten das solche kelch nicht zu weyt schweyffig sein/darauf man den nicht wol ane vorgießung vnd vorhehrung trincken odder gysen kan.

Item Lyn grosse silbern odder ander kandel die man neben dem kelch auff solche fest zu brauchen hett / Welch gefesse man billich sonst zu nichts anders brauchen solt/Darnach mag man sich auch wol an anderen ortten / wo vil volcks ist/richten.

Item Das Sacrament nicht einzusperrern/ sondern/ bey den francken zubenediciren/also/ das der diener brot vñ weyn mit yhme neme/damit der francke die heylsamen wort anhöre.

Ziebey hat man den pfariern ym Synodo ein wenig weyter zusagen/wie yhnen auch die ganze andere ordenung muß durch solche Visitation vorkündiget vñ ercleret werden.

C

vom Tauff

Vom Tauff.

Die Tauff sol gescheen yn der kirchen/wie vor/alleyne yn lauterem wasser/darzu ym gewonlichen tauffteyn erhalten/welchs mag vernewet werden so offte es von nöten ist/vnnd bedarff nicht der Osterlichen alten Ceremonien/auch keynes ehels oder cresems/vnd sol yn allwege yn deutscher bekantertzungen geschehen/mit den gewonlichen exorcismus vnd gebeten/so wil es die zeyt anders leyden wil/doch das man keynen notzwang darauß mache/wenn alleyne sonst die rechte form gehalten wirt.

Item die kyndeleyne so daheyme recheschaffen genot taufft seyn/wie/dan solchs auch recheschaffen gescheen soll/mügen nicht widder vmb ynn der kirchen getaufft werden/darvmb es eyn vorsportung der heyligen tauff ist wenn man allererst zweyffeln wil ob solche kyndeleyne getaufft seyn odder nicht/vnd sol mit gütter berichtung des volcks solchs widderteuffen yn alle wege abgestelt werden.

Von offentlicher Busse.

Diueyl yn diesen landen das erdrücken der kleyne kyndeleyne ganz gemeyn vnd yn großer zal befunden wirt/also das es/wie wol ane willen vnd fursatz/doch nicht ane vnachtsamkeyt/vnnd derhalben nicht ane merckliche schulde der mutter geseyn kan/Als nemlichen auß trunckenheit/oder das sie also vnvorsichtig seyn/vnd die kyndeleyne zu sich yn yhre bette legen &c. Derhalben auch die Christlich gemeyne billich gegen solchem offenbaren großem vbel die Christlichen straffen des Bannes brauchen sollen/vnnd eyn solche person nicht fur ein Christlich gelied erkennen nach annehmen/sie habe den zuvor yn offner busse/das yhr solche sünde leyde sey vnd das sie hertzlichen der gnaden begere/fur der ganzen gemeyne des orts genugsam erzeygt/Als nemlichen
das sie eynen

das sie eynen Sonntag / drey odder viere / nach vmbstendig-
keit der sachen / an eynem sondern sichtbarn ort ynn der kir-
chen vnder der predigt stehe yn demütiger flehender gebers
den / vnd vom prediger dem volck angezeygt / Nach der pre-
digt aber widder auß der kirchen gewysen werde / biß das
sie enlich der gemeyne versünnet vnnnd absoluiert werde / Wie
dann solcher vorsünung vnd absolution eyn form vnd an-
weysung am ende dieser ordenung vorzeychent ist,

So aber yemandt sonst fursetzlich odder yn zorn eynen
mort begehet / Wo solcher den weltlichñ gerichtten entbücht /
sol er fur seynen Bischoff gewysen werden / alda seyn offents-
liche Busse thun / vnd absolution empfangen / Doch sol solche
busse yn keynem falle fur eyn genungthuung geacht werden /
Welche ehre alleyn dem blut vnd todt vnser herin Ihesu
Christi gebürt / sonder alleyn als eyn beweysung eynes leydis-
gen demütigen gnad begyrigen gemüts gehalten / auch sol
ynn keynen weg hierynne eygener nutz gesucht werden / Wie
dann etwann die Busß genys getragen hat.

Von der Ehe.

Das auffbitten odder verkündigen der Ehe sal auffß we-
nigst acht tage fur der köstig gescheen / d amit raum gelassen
werde dem yenigen so villeychte dareyn zusprechen hette.

Item Das dieselben so zu der Ehe greyffen / zunor / wo
sie unbekant seyn / Ihre namen vnnnd zunamen landt elteru /
auch herrn / wo es diener weren / nennen sollen / Wie auch
solchs eygentlich auff der Cangel sol namhafteigt gemacht
werden.

Wyr wollen auch die gerichte der Ehesachen mit geschick-
ten redelichen Officielen bestellen / Welche mit Gottis wort
vnd nach demselben zu vrteylen wissen / oder ye / wo sie nicht
gantz gewisse weren / guts rats pflegen.

C ij Wo nu

Wo nu auff dem lande vnnnd Stetten den ampteleutten/
Rethen/ Pfarern/ oder Predigern solche Ehesachen furque-
men/die do eynicherley weyße yrig weren/Als in den worten
der Ehestiftung/odder meynung derselben/odder wo sie eyn
ander der bewilligung aufffallen / odder wo die Ehe auff ey-
nen truncken abent oder sonst hynderlistig auffgericht/ vnd
darnach dem eynen nicht gefallen wolt./ odder auch hynder
den eltern vnd wider yhren willen geschehen were/die solchs
nicht gestatten wolten.

Item ob es der gesibschafft halben zu nahen were odder
zu nahen seyn gesehen wurde/ Oder aber eyniger eynsprach
halben / odder anders dergleychen gebrechen haben würd/
Sollen die part an den Official gewysen werden,

Item Das eyn Official auch eynen bestympten tag ynn
der wochen hereyn gen Königsbergk kömen sol/dergleychen
den anderen vomemlichen Stetten zu gelegener tzeit vnnnd
stelle des gerichtes warten / solche sachen Czuuerhören / das
mit die prediger so vil weniger anlaffens derhalben haben/
vnd anderer sachen/so yhnen beuolen/aufwarten mögen.

Ehebruch.

So der beklagte teyl vmb Ehebruch odder sonst andere
gebrechen / vor dem Official nicht erscheynen nach gehor-
samen wolt/ sollen die Ampteleute oder Burgermeyster pfli-
chtig seyn dar ob zu halten/hilff vnd beystand zuthun/das
mit das vbel gestrafft werde.

Wo aber eyn parth des Ehebruchs vberwoysen/ sol der
Official dem vnschuldign teyl eynen gezeügnisß brieff geben
Warumb er solche Ehe geschyden / damit dasselbe vnschul-
dig/ob es widder freyen wolt/ sein recht vnnnd erleubnyß an
allen orten möcht beweyssen,

Item Es were auch wol gut yn solchem fahl des Ehe-
bruchs

Bruchs dem Official allerwegen eynen Rathman zuzugeben
damit auch die weltlichen gerichte alhier yhr einsehen haben
mochten / vnd diß groß vbel nicht allzeyt vngestraftt bylebe/
wie bißher eyn schedlicher brauch gewesen ist.

Von Festen.

Item Alle festa Christi vnsers seligmachers / zurgedech-
nyß vnd ermanung der kalten vnnnd kyndischen Christen /
welcher allzeyt eyn groşteyl seint / zuhalten / Als nemlichen
Natiuitatis Christi / Circumcisionis / Epiphanie / Purificatio-
nis / Annūciationis / Cene domini / Parasceues / Pasce / Ascen-
sionis / Pentecostes / doch ane frembde zusetze / als des Liecht-
weyhens / fladenweyhens vnd dergleychen.

Item Auff solche fest sol die predig sonderlich vom gedech-
nyß des festis geschehen / damit die großen heylwertigen wer-
cke vnsers Gotes so vil weniger bey den kalten ynn vorgeß-
zung kömen mögen.

Item Weynachten / Ostern / vnd Pfingsten sollen mit vol-
genden zweyen tagen gehalten werden daran man auch al-
lenthalben predigen sol.

Item Auff solche festa / nemlichen die furnemsten drey /
sal man zu merer solemnitet die sonderlichen deütschen ge-
senge von solchen festen / auch gewonlich responsoria yn dem
ampten halten vnnnd eyntheylen / Als auff Weynachten dem
hymnum Al solis ortus / deütsch / das Respons Verbum caro
factum / zur Vesper vnd Metten / Das Grates nunc omnes
deütsch odder lateyn. Item Eyn Ryndeleyen so löbeleych zur
Messe vnd predig ꝛc.

Item Das gedechtenyß Johannis Baptiste / auch aller
Aposteln sollen zu yeglicher zeyt / wie sie ym Jar gefallen /
auff den vorgehenden Sonntag vorkundiget werden / nicht

feiertag zumachen / sonder das es gut ist das man solche
Christliche exempel so vil man auß gewysser heyliger schrifft
haben mag/ dem volck furbilde / vnd nicht vorlesen laß /
Welchs auch als dan bey der verkundigung odder am tage
yn der Lection mit kurzen wortten geschehen sol / Auch die-
net solch verkundigung den vngelereten zu vnderschydung
vnd merckung der zeit/ auß welcher visach man yhnen auch
andere tage/ darauff gewonlich die frist/termyn vnd czalung
stehen/ verkunden möcht/ als Michaelis/ Martini ꝛc. gleych
wie man etwan eyn langezeyt den Newen monden verkun-
diget hat yn der kyrchen.

Von Begrebnys.

Solchs sol man an eynem odder mehr gelegen orten außser
der stad alhier zu Königsbergk habn/ die visach seynt leycht
zuerkennen/ darumb vnnötig zuerzelen.

Item es ist löblich das man/ gegen toden vnd lebendigen
die liebe zu vben/ volge zum begrebnys/ man hat auch dies
ses fleysses vil exempel ym alten vnd neuen Testament.

Item So yemant der Capellanen oder diener hiez zu be-
geren wurd / Sollen sie mit gehen wie ander freund ane ges-
senge / vnnnd bey dem grabe sol der diener eyn kurze vorma-
nung zu trost vnd vnderricht der lebendigen thun/ vnd dars
auff das volck eyn deütsch Media vita singen lassen.

Das aber yn dieser vormanung nichts vnformlichs eyn-
geführt werde- ist das eyn sonderliche anleytung am ende dies-
ser ordenung gestellt.

Item Formlich ist es das das volck hiez zu mit einem kura-
zen / aber doch kentlichem gelewt beruffen werde bey dem
glöckner zubesstellen/ Wer es aber nicht wol vormag/ lasse es
lieber nach.

Item wo

Item Wo sich aber yemande yhe bey den pfarren yn der stadt wolt begraben lassen / mocht man darauff setzen vngesuerlichen etliche marck / wie auch zuuor yn der Aldestadt zu Königsberg gewonliche / zum theyl dem gemeynen Rasten zu gut zum teyl das mit auffszung solchs geldes gewehret wurd / das es wenig begerten.

Solchs alles sollen auch andere kyrchspiel nach gelegenheit annemen vnd nach vermögen nach volgen.

Visitation oder Synodus.

Wyr wollen auch allewege ym yar eyn mahel oder mehr / nach dem es von nöthen seyn wirt / eyn yeglicher yn seynem Biscthumb Synodos machen / der Pfarhern oder Prediger leher vnd leben zuerforschen / yhnen yn yhren zweyffeln oder gebrechen reitz vnd hülfzig zu seyn / vnd was sonst yn Ecclesia von nöthen yst zuordnen / schaffen / Corrigirn zc. auch auffzusehen das yeglichs kyrchspiel yhre pfarkirchen / als eyn gemeyne gebede / yn wesenlichem barw halten.

Item Wo es alhier zu Königsbergk odder diefsergeleychen orten mangelt an Chorgesang zubestellen / mag man etliche der alten priester / so hier zu dienstlich / darczu ordnen / diuweyl man sie doch bey yhem eynkömen bleyben lezt / vnd sie yhe bi oth auch nicht gar vmb sonst essen sollen.

Beschluß.

Solche vnser ordnung / wie allenthalben oben vorzeychent / so vil derselben eynes yglichen orts odder kyrchspiels gelegenheit dienstlich / sol an die pfarrer odder kyrchen diener yn den Sinodis oder visitation mit gutter vnderichtung getragen werden / Welche darnach weyter yhr volck darvon fleyszig vnd bescheydentlichen berichten sollen / ehe den eynliche anderung

che anderung furgenömen / damit/so vil es möglich/alle ergernys vorhütet werde / Wyr wollen aber mit dieser vnser ordnung yn keynen weg vornichtet vnd vorworffen haben anderer Bischtumb vnnnd kyrchen weyse vnd gebreuch / so fern sie sonst Gotlichem worde nicht entgegen seyn/Erbieten vns auch gegen menniglichen/vnser furnemens Bewegung vnnnd vrsach/ so vil es von noten seyn wirdt/ anzuzeygen. Welches wyr von kurze wegen yn diesen schrifftten vnderlassen haben/Angesehen das solche schrifft an die vnseren gestellt/bey welchen solchs alles ane das mit grunelicher vnderrichtung muß geprediget werden / Wie dan yn den furnemsten artickeln bereyt fast ist bestehen. Diuwoyl wir aber / wie ym anfang vormelt ist/ niemant cyniche not nach geczwang aus dieser ordnung / so vil sie menschlich ist/machen/wollen wyr auch vns selbst vnnnd vnseren nachkömen den weg hiemit nicht gesperret haben/dieselben vnser ordnung/nach enderung der vmbstende/ mit der zeyt etwann zu endern / mehrten odder myndern/wie man solchs ynn guttem Rathe wird finden mögen/Doch kan yederman wol abnemen/das von wegen Chustlicher eynigkeit / sich nicht gebüren wil / nach zu gedulden were/so yemands seynes kopffs vnnnd gefallens dysse berwilligte ordnung vorachten wurde vnd vbertreten/des wyssse sich menniglich zuhalten.



Folgen die Formen
vnd anleytung
zu vor ange-
zeigter
Ord-
nung vor
meldet vnnnd
vorheyschen.



Die vorrede des Vater vnfers

Inn der Messe.

Lasset vns hertzlichen beten dann Christus hat vns gehey-
ßen vnnnd darvber selbst gelernet zu beten / auch haben wir
gewysse zusagung vnser Gottes / das er aus gnaden vnd
warheit vns / so wir bitten / erhören wil.

Vormanung fur dem Altar

Zu den Cömunicanten.

Ihr lieben zc. dieweyl euch hungert vnnnd durstet nach der
Barmherzigkeyt Gottes / vnd hertzlichen Begeret vorgebung
ewer sunden / So hat vnser heylant Christus seinen leib vnd
Blut fur euch gegeben / das euch ewere sunden sollen abgewa-
schen sein / so vil ewer seint die solchs gleroben / vnd hat der
halben auch hieher gestellet zum zeychen seyn fleyßch vnnnd
Blutt / damit yhr versichert seyt gleych wie es yetlicher fur sich
entpfehet / das er sich auch also fur sich des Euangelion vnd
eyns gnedigen voreynigten Gotes zu trosten vñ anzunemen
habe / So richtet nu ewere hertzen auff mit starcker hoffnüg
vnd hertzlicher zuuorsicht / vnd entpfahet das hochwürdige
geheymnus wie yhr glerobet so geschicht euch.

Im darieychen / Nym hyn vnnnd yß zc. Vt supra. 78. B ij.

Form eyner kurtzen furgehenden

Vnderrichtung vnnnd Befragung der yenigen so
Cömuniciren wollen.

Azum ersten das man sie vnderichte wie es nicht genug
sey zu gleroben das vnter dem brot sey der leib Christi / vnd
vnter dem weyn seyn warhafftig Blut / Sonder das vil eyn
hoher vnd großer glawbe dazzu gehöre / Nemlichen das du
glawben solt das dir deyn herre Christus ym Sacrament
a ij. durch

durch seyn wort trostlich zusagt das sein leyß vnd blut deyn eygen sey / Ja das dyr alles geschenckt sey was die wort yn sich haben Nemlichen vorgebung deyner sunden vnnd eyn gnediger Gott.

Czum andern das man yhnen die wort furhalte yn welchen Christus das Sacrament gegeben hat / Nemlichen Nemet hyn vnd esset. Math.26. Mar.14. Luce.22. 1.Cor.11.

Czum dritten das man yhnen anzeyge/wie yn den selben worten die ganze macht nutz vnd frucht lygt/so sie mit dem glauben yn das hertz gefasset werden.

Item Wie der glawbe an dieselben worte die recheschafftene bereytung sey/ Wen dich deyn sunde trucket vnd gnade begereft.

4

Die fragen oder verhoze.

Es geburt eynem Christen das er recheschafft vnd antwort geben kan / so man yhn fraget warumb er das Sacrament begere vnnd neme / denn wo man nicht wußt wo zu man es begert/ ist besser davon zusbleyßen.

Frag/ ob er eynen recheschafften glauben habe/ vnnd was das Sacrament sey.

Antwort/ das die wort Christi Nemet hyn zc. vnnd der leyß vnd blut Christi vnter dem brot vnd weyn das Sacrament sey.

Frage/ was er da suche ym Sacrament vnnd warzu es gebrauchen wil. Antwort/ das er darynne suche seynen glauben an das wort zusstercken vnd sein gewyssen zutrosten.

Frage / ob sie aus gewonheyt / altem brauch/ gesetz/ des Babstszwang der eltern odder yhier herren odder dergleychen dartzu vorursache / wollen zum Sacrament gehen / sie dafur zu warnen / Antwort/ das sie durchs Euangelion gelernet

gelernt von yhn selbst freywillig aus hunger vnd glawben
herzu kômen.

Item Ob er eynen ernstern vordrys habe vber sein voriges
sunchafftigs leben/ vnd eyn hertzlich begyrde eyn recheschaf-
fen Christlich weſen hynfurther zufuren/ vnd hiez zu stercke
ſûche ym wort vnd Sacramente

Form der offnen beycht

nach der predigt.

Dieweyl myr nu das heylig Gottis wortt gehort haben/
Welchs ym glawben gefast reyniget die hertzen / So laſet
vns vnſer funde vnnnd myſſetat bekennen/ das wir es nicht
ane frucht faren laſen / vnd ſeyntemal eyn yeglicher ſich yn
funden findet/ ſo muſſ er bekennen vnnnd ſprechen/ Ach herre
gerechter vnd barmhertziger Got ych bekenne das alle meyn
weſen vnd leben ynnnerlich vnd euſſerlich nichtis dan funde
iſt/ vnd alle meyn gedanken worde vnd wercke aus myr ſel-
ber nichtis anders dan lauter vbel vnd myſſetat/ derhalben
begere ich gnade durch Iheſum Chriſt deynen lieben ſohn /
Er arme dich meyn vmb ſeynen willen / den du myr zu ey-
nem hohenprieſter vnd mitteler geſtellet haſt.

Anleytung der ermanung an die

lebendigen freunde vnd nachfolger zum begrebnysſ.

Das die ſchiffte nicht vorbeit ſonder lobet die yenigen
ſo ſich betrûben vmb der verſtorbenen freunde willen.

Die liebe des freundes macht das man ſich betrûbt/ das
man aber ſich zûbetrûben nicht auffhoret / odder dorynne
keyn maſſ helt/ macht der vnglaube,

Alſo beweynet Abraham ſeyne Sara Gen. 23 Joſeph
mit den Erzwetern beweynet den Jacob Gen. 50. 7c.

a iij Stephanus

Stephanus ward begraben vnd beweynet von etlichen
Gotforchtigen Actuum 8. Johannes der teuffer von seynen
Jungern Math. 14. Joseph von Arimathia begrebet Chri-
stum Math. 27.

Wiewol diß alles die toden nicht hylffe so ist es doch cyn
anzeigung der liebe so die lebendigen zu yhnen getragen
haben/ geschicht auch zum teyl zutrost den betrubten freun-
den des vorstorbenen / Man darff fur des vorschynenen seel
nicht opffern nach singen nach klyngen nach reüchen nach
spriengen / Sonder wir lebendigen sollen vns ym begrebnysß
erynneren das wir den weg auch gehen müssen vnnnd gerne
gehen sollen.

Die letzten drey obgeschriebenen formen seynt alleyne an-
leytung weyße/fur die yenigen dyner gestelt/so sich selbst hier
ynne nicht zuweyßen wyssen.

7.

Folgen die Collecten oder
gemeynen gebethe/ Zur Messe/ Vesper/ vnnnd
Necten des ganzen Jares.

Dominica prima Aduentus.

Wyr bitten o herre erwecke deyn goelich gewalde/ vnd löse
me vns zuhülff / das wyr durch deyne beschutzing mogen
von zukunfftigen ferligkeyten vnserer sunden eriettet werden
vnd las vns mit deyner erlosunge werden gehulffen/ der du
lebest vnd hyrschest Got mit dem vater yn eynigheit. des heyligen
geystes von ewigheit zu ewigheit,

Dominica Secunda.

Erwecke O herre vnnsere hertzen zu bereyten die wege deynes
eyngebornen/ das wyr durch seyne heylsam zukunfft dyr
mit gereynigtem gemuet mogen dienen / Der mit dyr lebest
vnd hyrscher.

Dominica Tertia.

Wyr bitten O herre nym vnser gebethe zu deynen oren/
vnd erleuchte die finsternis vnser gemüttes mit deyner gnaden
heymsuchung/ durch vnsern herren Ihesum.

Dominica Quarta.

Wyr bitten O herre erwecke deyne macht vnd löse vns
zuhülffe mit großer crafft/ auff das der ablas deyner barm-
herzigkeit/ herzubreng was sonst vnser sunden vorhyndern
der du hyrschest vnd lebest.

Die natalis Domini.

Wyr bitten O almechtiger Gott/ vorleyhe das vns die
newe durchs fleyßch gebürt deynes eyngebornen sohnes erlöse
sie / welche die alte dienstbarkeit gebunden heile vnder dem
Joch der sunden / durch denselben vnseren herren Ihesum
Christum deynen sohn der mit 2c

Dominica sub octauis.

Almechtiger ewiger Got/schicke vnser werck nach dey-
nem wolgefallen/ auff das wyr yn dem namen deynes gelieb-
ten sohnes / mogen yn rechtschaffenen guten wercken vber-
flussig reych seyn/durch den selben vnseren ꝛc.

In die Circumcisionis.

Almechtiger Got wyr bitten/gib das yn vns die wir mit
dem neuen liechte des vormenschten wortcs / ynwendig bes-
gossen seint/auch außbrechen die wercke des liches / vnd ey-
nes beschniten hertzen ꝛc.

In Epiphania.

herre Got der du auff den herwtigen tag deynen eyngesbor-
nen sohn/ den heyden durch den furchenden stehrn hast ge-
offenbaret/Vorleye vns gnediglichen/das wir so dich yezut
haben durch den glauben erkant / gefüret werden bis zu der
beschawung der gestalt deyner hohe/durch den selbigen ꝛc

Dominica sub octauis Epiphanie.

Wyr bitten o herre fuege mit hymelischer gütte / die begyrde
des bittenden volckes/ auff das sie mogen erkennen was zu
ethun sey/ vnnd yn dem das sie erkennen/krefftig werden zu
vorbringen durch vnseren herrn ꝛc

Dominica Secunda.

Almechtiger ewiger Gott der du zu geleych die hymelische
vnd ydische dinge regirest/erhoere miltiglichen das gebet dey-
nes volckes/vnnd vorleye vns deynen heyligen Friden/durch
vnseren herrn Ihesum ꝛc

Dominica Secunda.

O Almechtiger ewiger got syhe an gnediglichen vnser geistliche krankheit/vñ recke auß die rechte deyner maiestat vns zubeschyrmten/Durch vnseren 1c.

Dominica Tertia.

O Got der du weyst/das wir yn solchen ferligkeyten gesetzt/nach menschlicher gebrechlichkeit/nicht mogen bestehen/gib vns das heyl gemüttes vñnd leybes/auff das wyr die dinge welche wyr vmb vnser sunde willen leyden/mit deyner hulff vberwinden/Durch vnseren 1c.

Die Purificationis.

O Almechtiger ewiger Gott/Wyr bitten ynniglichen deyne Maiestat/das gleych als deyn eyngeborner sohn/an dem herwtigen tage mit dem wesen vnser leybes dyr ist dargestellet worden yn den tempel/also mache auch das wyr mit gereynigtem gemüt dir werden dargestellet/Durch denselben vnseren herin 1c.

Dominica Quarta.

Wyr bitten dich O herie Beware deyn gesynde yn stetter güteikeit/das dasselbe so sichs alleine auff die hoffnung der hymelischen genaden anlehnet/werde allezeyt befestiget mit deyner beschyrmung/Durch 1c.

Dominica Quinta.

Beware deyn volck O herie Got/vnd mache es deynem namen andechtig/auff das es der götlichen wolthat vnderworfen/die zeytliche dinge recht handele/vnd entpfahe die ewige gaben/Durch vnseren herin.

Dominica Septuagesima.

Wyr bitten dich O herre erhöhe mildiglich die gebethe deynes volckes / das wir / dye do billich gestraffet werden vns vnserer funde / zum preys deynes heyligen namens gnediglich werden erloset.

Dominica Sexagesima.

O Got der du syhest das wyr auff kein vnser wirckung vortrawen / vorleyhe gnedighen das wyr wider alle widerwertigkeit durch deyne beschyrmung werden befestiget.

Dominica Quinquagesima.

O herre erhöhe gnedighen die gebete deynes volckes / vnnnd so wir erloset werden von den banden vnserer sunden / behüte vns auch fur allerley widerwertikeit / Durch vnsern herren.

Die Limerum.

O Got der du durch die funde vnnnd schuld wirst erzeinet / vnnnd durch buße vorsünet / sich an gnedighen das gebete deynes demüthigen volckes / vnnnd wende aße die geysfel deynes zornes / die wir mit vnsern funden haben vordienet / Durch vnseren herren ꝛc.

Dominica Quadragesima.

O herre wir bitten dich an deyn gesynde / vnd vorleyhe das vnser gemüte bey dir mit hymelischer begyrdten erscheyne / so es sich mit schwchung des fleysches casteyet ꝛc.

Per Hebdomaden Oratio.

O herie biß deynem volck gnedig/ vnd welchs du dir mache
est andechtig dasselbige erquickte auch barmherziglich mit
freündlicher hulff/ Durch vnsern herin ꝛc.

Dominica Reminiscere.

O herie Got der du syhest das wir allenthalben krafftloß
seyn/beware vns ynwendig vnnd außwendig / auff das wir
widder alle widderwertigkeit werden befestiget / vnnd von
schñoden gedanken gereyniget/Durch vnsern herin ꝛc.

Dominica Sculi.

O almechtiger Gott/ wir bitten sych an die begyrde der der
müetigen/ vnd strecke aus den arm deyner Maiestat zu vnser
beschrymung/Durch vnsern herin ꝛc.

Dominica Letare.

O almechtiger Gott wir bitten vorleyhe das wir vnns an
deyner gnaden trost widder erholen / die wir auß vordienst
vnser wirckung werden gestraffet.

In die Annunciationis.

O Gott der du hast gewolt / das deyn sohn solt von dem
leybe der heyligen yungtfraw Marien/ durch vorkündigung
des Engels das fleysch an sich nemen / vorleyhe vns deynen
ynnigen die wir warhafftig gleroben das sie Gottes geberer
ryn sey/das wir auch den nutz vnd die frucht seyner mensche
werdung mögen vberkömen/Durch denselben vnsern herin
Ihesum Christum ꝛc.

Dominica Judica.

Wir bitten dich O almechtiger Gott dich an gnediglicheⁿ
deyn gesynde das es durch deyne gabe regiret werde am leybe
vnnnd durch deyne enthaltung bewaret werde ym gemüthe/
Durch vnseren herin ꝛc.

Dominica Palmarum.

Almechtiger ewiger got/der du vnseren heilant dem mensch
lichen geschlechte zu heyl/vnd auch zu eynem exempel nach
zu volgen/hast lassen den leyß an sich nemen/vnd vnder das
kreütz sich ergeben / vorleyhe gnediglichen das wir würdig
mogen werden zuhaben die lehre seyner gedult/vnd zu sein
mitgenossen seyner aufferstehung/Durch denselben ꝛc.

In Cena domini.

Almechtiger ewiger Got/ vorleyhe das wir die geheymniß
des leydens vnser herin Ihesu Christi/ also handeln mo-
gen das wir dadurch vorgebung vnser sunden entpfahen
Durch vnseren herin ꝛc.

Magna sexta feria.

O herre Gott der du deynen sohn fur vnns am galgen des
heyligen kreützs hast wollen leyden vnnnd sterben lassen/ auff
das du von vns trybest des feyndes gewalt/ vorleyhe vnns
deynen knechten/das wir die genade seyner aufferstehung er-
langen/Durch denselben ꝛc.

Alia Oratio.

Wir bitten o herr dich an diß deyn gesynde/fur welchs vnser
herr Iesus Christus nicht hat vorsaget sich zu begeben yn dy
hende

hende der schulbigen / vnd nicht geschewet sich zu vnderwerf
fen der pein des creützes. / Der mit dir lebet vnd hirschet Got
yn eynigkeit des heyligen geystes von ewigkeit zu ewigkeit

In die Resurrectionis Dominice.

O Got der du an dem herwtigen tage durch deyn eyngewor
nen sohn / do er hat vberwunden den todt / vns hast auffge
schlossen den zungang der ewigen seligkeit / wollest vnser be
ger / welche du durch furkömende genade anregeßt / auch mit
deyner hulffe volführen / Durch denselben vnseren herin ꝛc.

Per Hebdomadam.

O Got der du mit der herlichen aufferstehung deines sohes
vns yerlichen erfreuest / vorleyhe gnediglichñ das wir durch
den glauben seyner vnnnd vnser aufferstehung mogen kömen
zu den ewigen freuden / vnd zum vnsterblichen leben / Der
mit dir lebet vnd ꝛc.

Dominica prima post resurrectione.

O almechtiger ewiger Got der du den menschen hast gege
ben die Osterliche geheymnys zu eynem bunde der vors
nug / vorleyhe daneben vnserem gemuet so wir solchs mit
dem munde bekennen / das wir auch demselben mit der that
nach folgen.

Dominica Secunda.

O Gott der du yn deynes sohnes nyderung hast die nyder
geschlagene welt auffgericht / vorleyhe deynen gleüßigen die
ewige fröude / vnd die du hast erloßet von dem fahl des ewi
gen todes / mache auch das sie der ewigen freuden genyßen
Durch denselben vnseren herin ꝛc.

Dominica Tertia.

O Got der du den yrenden/auff das sie mögen yn den weg der gerechtigkeit widderkeren/ erzeygest das liecht der warheit / gib allen den die fur Chüstlich gehalten werden / das sie alle ding meyden / welche diesem namen entgegen seyn / vnd widderumb alle dem nachfolgen welchs diesem bekentnyß zu eygent/Durch vnseren ꝛc.

Dominica Quarta.

O Gott der du deyner geleybigen gemüete machest eynes willens/ gib deynem volck/das zu lieben was du gebeddest/ vnd das zubegehren was du zusagest/auff das vnder den vnstetten yrdischen dingen/dahyn vnser hertzen gehaffet werden da die warhafftige freude ist/Durch vnseren ꝛc.

Dominica Quinta.

O got von welchem alles gut herkumpt/gib deynen andechtigen/ auff das wir durch deyn eyngelien betrachten / was recht ist/ vnnnd durch deyn regyrung auch eben dasselbe thun vnd vben.

In die Ascensionis dominice.

Wir bitten o almechtiger got/ vorleyhe das alle die wir gleichen/das deyn eyngelieber sohn vnser erlöser als am herwärtigen tage vns zugut zu hymel gefaren ist / auch wir selbst mit dem hertzen mögen wonen ym hymelischen wesen.

Dominica post Ascensionis.

O almechtiger ewiger Gott mache das wir allezeit zu dir tragen eyn gutten willen/vnnnd deyner Maiestat mit reynem hertzen dienen.

In die Penthecostes.

O herre Got der du die hertzen der glewßigen als am heiligen tagen durch erleuchtung des heylighen geystes hast gelehret gib vns ymselfen geyste was recht ist zuuorstehen/ vnd das wir vns allezeyt seynere tröstung mögen frewen.

Per Hebdomadam.

Wir bitten O herre/ das vns beystehe die krafft des heyligen geystes/ dy vnser hertz miltiglichen rüste/ vnd vns vor allem widerwertigem beschutze.

Dominica Trinitatis.

Almechtiger ewiger Got der du vns armen deynen dienern durch bekentnyß des warhafftigen glawbens hast gegeben anzunemen die herligkeit der ewigen dreyfaltikeit/ vnd hast vnns vorlyhen yn der macht der Maiestat anzubethen die eynigkeite / Wir bitten das wir auch durch die bestendigkeit desselben glawbens wider alle anfechtung beschyrmert werden

Dominica prima post trinitatis.

O Gott ein stercke aller die auff dich hoffen/ bis gnediglich gegenwertig vnserem anruffen / vnd dieweil menschliche schwachheit nichts on dich vormagt/ So vorleyhe vns hulff deyner genaden/ auff das wir yn deyner gebot erfüllung mit willen vnd wercken dir mogen gefallen/ durch vnsern 7c

Dominica Secunda.

O herre schaffe das wir haben stetige furcht vnd liebe deynes heyligen namens/ den du vollesest nymer mit deyner erzygung welche du rütest mit der festigkeit deyner liebe 7c.

Dominica Tertia.

Wir bitten O herre erhoere gnediglichen vnser e bethe vnn
welchen du gibest den syn zubitten/denselben vorleyhe auch
die hulff deyner beschutzung,

Dominica Quarta.

O Gott ein beschyrmer deren die auff dich hoffen / on wela
chen nichts stanchafftig nichts heylig ist / mache manig
feltig deyne barmhertzigkeit vber vns / auff das so du regirer
vnd furer bist / wir also gehen durch die ezeclichn gütter das
wir nicht vorlyren die ewigen.

Dominica Quinta.

Wir bitten O herre gib das vnn der weylauff durch deyne
ordnung frydelich werde geschicket vnd das deine vorsam
lungen mit styller andacht sich frewe.

Dominica Sexta.

O Got der du denen die dich liebhaben bereyt hast vnsehen
bar gütter / gewiß yn vnser hertzen den willen deyner liebe /
auff das wir dich yn allen vnn vber alle ding lieb haben /
vnd deyne vorheyschung erlangen / welche alle begyrde vber
treffen,

Dominica Septima.

O Gott der kreffte welchs ganz ist was das allerbeste ist /
pflanze yn vnser hertzen die liebe deynes namens / vnd gib
vnn die merung des Gottis dienst / auff das du das gute
nehrest vnd das erneerete yn gotseligem fleiß bewarest,

Dominica Octaua.

O Got welchs fürsichtigkeit yn yhier ordenung nicht wird
tetrogen / wir bitten ynniglich das du alles schedliche hyn
weg thuest/vnd alles was nützlich ist vorleyhest.

Dominica nona.

Wir bitten O herie gib vns gnediglich den geyst/ zubertrach
ten vnd zuthun allezeit was recht ist/auff das wir/ die one
dich nicht mogen seyn/nach dir mogen leben.

Dominica Decima.

O herie las die oren deyner Barmhertzigkeit offen stehen dem
gebet deyner ynnigen/vnnd auff das du den bittenden gebest
was sie begeren/so mach das sie forderen was dir beheglich
ist.

Dominica Undecima.

O Got der du dein almechtigkeit allermeyst erzeygest durch
vorschonen vnnd erbarmen /mach vber vnns manigfaltig
beyn Barmhertzigkeit/ das wir nach deyner zusage lauffen /
vnd du vns machest mitgenossen der hymelichen gutter

Dominica Duodecima.

Almechtiger ewiger Gote der du aus vberflussigkeit deyner
gutte vbertryffest den vordienst vnd begyrde der bittenden /
mache deine Barmhertzigkeit manigfaltig vber vns/auff das
du vorgebest was das gewyssen fürchtet/vnd zugebest wes
sich des gebeth nicht vnderstehet.

Dolina decimatertia.

O almechtiger ewiger Gott aus welchs geschenke es her
komet das dir von deynen gleüßigen würdiglich vnd loblich
gedienet wirt/wir bitten gib vns das wir on verletzung lau-
ffen zudeynen vorheyschungen

Dominica decimaquarta.

O almechtiger ewiger got gib vns die vormerung des glau-
bens der hoffnung vnd der liebe/ vnd auff das wir erlangen
mogen / was du vorheyschest / las vnns liebhaben was du
gebeüttest.

Dominica decimaquinta.

O herre behüte deyne gemeyne mit ewiger gunst/vnd syntes
mal die menschliche sterblichkeit on dich hynfiele so werde sie
allegzeyt durch deyne hülffe abgezogen von allem schedelich-
chem vnd werde gerichtet zu dem heylsamen.

Dominica decimasexta.

O herre wir bitten das die stetche erbarmung reynige vnnd
beschyrmeyn deyne gemeyne/vnd diuweyl sie nicht kan one dich
feste bestehen / so werde sie allegzeyt aus deyner begabung ge-
regiret.

Dominica decimasextima.

Wir bitten **O** herre deyn gnade woll vns allegzeyt zuffurkō-
men vnd nachfolgen/ vnnd vns stetiglich beslyssen machen
zu guten wercken

Dominica decima octaua.

O herri wir bitten gib deynem volck das es vomeyde dy teuffelische befleckung/ vnd dir Got alleyne nachvolge mit lauterem gemütte/Durch vnsern herin Ihesum Christum deynen sohn der mit dir herschet vnd lebet yn eynigkeit des heyligen geystes von ewigkeit zu ewigkeit.

Dominica decimanona.

O herre wir bitten das deyner Barmhertzigkeit wirkung/ wole vnser hertz richtig machen/ den one dich können wir dir nicht gefallen/Durch vnseren herin Ihesum.

Dominica Vigesima.

Almechtiger Barmhertziger got schließ aus gnediglich alles das vns zu widder ist / auff das wir zugleych an leybe vnd gemüthe geschickt/das deine mit freyem gemüte volbringn/Durch vnseren herin 2c.

Dominica Vigesima prima.

Wir bitten o herre gib miltiglichen deynen gleichigen ablas vnd fryde/auff das sie auch gereyniget werden von aller vorlesung vñ dir mit sycherem gemüte dienen/Durch vnsern,

Dominica Vigesima secunda.

O herre wir bitten Behüte deyn hauffgesynde mit stetter miltigkeit/auff das es/so du beschirmest/frey sey von aller verdorwertigkeit/ vnd yn gutten wercken andechtig sey deynem namen/Durch vnseren herin Ihesum Christum.

Dominica Vigesima tertia.

O got vnser zuflucht vnd krafft bis gegenwertig dem got seligen gebethe deyner gemeyne/ der du selber bist ein vrsprung der gotseligkeit/vnnd gib das wir kreffteiglich das erlangen/welchs wir getreülichen bitten durch vnsern herrn

Dominica Vigesima quarta.

Wir bitten o herie wende die gebrechen deyner volcker / auff das wir von vnserer sunde verknuppung/die wir vnserer gebrechlichkeit nach begangen haben/durch deyne gütte gefreyet werden durch vnseren herrn

Dominica Vigesima quinta.

O herie wir bitten erwecke den willen deyner gläubigen/auff das so sie die fruchte des götlichen werkes der liebe vnd des creützes schleüniger volbringen auch desto groffer erzney deyner gütte entpfahen/durch vnseren herrn.

8.

Folgen czwo gemeyne Colle

cten odder Complenden czum beschluß der Messen vber das ganze Jar abzuwechseln.



Allmechtiger Gott / wir bitten demütiglichenn/ mache vns recheschaffene gelyder vnnsers herrn vnnd heüßts Ihesu Christi/ das wir ynn seynen geystlichen leyß / das ist ynn die vnzertheylte gemeynschaft Christi/ vnnd aller seyner heyiligen/warhafftig gezogen werden / gleych wie wir diß Sacrament des leyßs vnd bluts / des selbigen vnser heylands haben czu vnns genommen/vnd eben wie er seyn leben vnd leyden fur vns dürrf tige sunder hat gegeben / vnd vnser sunde auff sich geladen /

also vorleyhe vns gnediglich / das wir auch durch solche vn
zertheylete eynleybung vnd vereynigung ynn alle gütter / gnad
vnd gerechtigkeit Christi / vnd seyner gleüßigen / warhafftig
mit gleüßigem hertzen gesetzt vnd genömen werden / Durch
denselbigen vnnsern herrn Jesum Christ deynen Sohn / der
mit dir herschet vnd lebt ꝛc.

Alia.

O Warhafftiger Got barmhertziger vater / wir bitten
dich hertzlich / lass vnnß durfffeigen / des heyligen ley
dens vnserß herrn / nutz vnnß frucht / das ist gnade
vnnß vergebung vnser sünde / mit gleüßigem hertzen recht
schaffen ergreyffen / gleych wie wir durch deynes heyligñ So
nes wort / seynen heyligen leyß vnd seyn theüres blut / welche
er für vnnß gegeben vnd vergossen hat / vnder dem brot vnd
weyn warlich haben entpfangen / Durch denselben vnnsern
herrn Jesum Christum deynen Sohn ꝛc.

Vorzeychnung der Responsorien.

9

In sandore vultus tui ꝛc ym Genesi.
Cantemus domino ꝛc ym Exodo.
Isti sunt dies ꝛc ym Levitico.
Qui persequēbantur populum ꝛc Numeri.
Audi ysrael precepta ꝛc Deuteronomij
Super muros tuos Iherusa. ꝛc. Josue / Iudicij / vñ Ruth
Preparate corda vestra ꝛc Regū vnd paralipo.
Muro tuo inerpugnabili ꝛc Esdre.
Adonai domine qui dedisti ꝛc. Iudith / Hester.
Si bona suscepimus ꝛc Iob.
Verbum iniquum et dolosum ꝛc. Proverbior.
Deum time ꝛc. Ecclesiast.
Super salutem ꝛc. Sapientie vnd Ecclesiast.
Omni tempore ꝛc. Tobie.
Tua est potentia ꝛc. Machabeor.

Folgen die Benediction oder
 beschluß geseng am end der Metten/ Vesper vnd Mess.
Diebus Festinis:

Es woll vns Got seynen seggen geben vnser Got seggen vns.
 Responso:

Vnd es sollen yhn forchten alle ende der welt. Amen

Quotidiana Benedictio:

Der her erleuchte seyn angesicht vber vns, Vnd sey vns gne
 dig.

11

Form der absolution vber die wey
 Ber so die kyndleyn on vorsatz erdruckt haben/auff
 der Cantzel offentlich zu handeln.

Lieben freund yn Christo euch allen ist vngezweyffelt
 wyssentlich/wie dyse Schwester in Christo.n.auff vnachtsam
 keit vnd vnuorsichtigkeit/wie wol ane willen/sich an yhrem
 eygenem blutte vnd fleyschs 7c versundiget/vñ da mit Gott
 den almechtigh schwerlich erzurnet hat/ vñ daneben solchs
 vbel vnther vns ganz offensar vnd ruchtig/da durch denn
 vnser Christliche vorsamlung nicht eyn Gerynge ergernys
 entpfunden hat/Dieweyl aber solche yhie misstat vnd erger
 nis/ sie genzlich rewet.vnd von Got dem vater/durch Ihe
 sum Christ/ Gnad vnd barmherzigkeit begeret/ die yhi vns
 gezweyffelt/auch von Gott ym hymel vnvorsage ist.

Da bey

Da bey auch / solch leydt / mit offentlicher Buß erzeyget / vnd
dadurch / sich mit vns allen / die sie also verfehlet vnd geer-
gert hat / zu versünen demüctiglich begeret / Sollen vnd wol-
len wir auch nach der lehre Christi vñ seynrer Aposteln / hertz-
lich gern yhr solchs vorzeyhen vnd vns Gotted willen vor-
geben / Auch Gott trewlich für sie bitten / er woll yhr gnedig
seyn vnd hynfureh sie vnd vns alle für solcher vnd anderen
ferlikeyten gnediglich behütten vnd bewaren / derhalben
last vns bethen ꝛc. Dicatur pater noster ab omnibus occulte /
et legatur deinde acōcionatore publicitus psal. Deus misereatur
nostri. vel psal. Miserere ꝛc. lingua vulgari ꝛc.

Post hac alloquatur penitentem

II. Schwester in Christo Diuweyl du das leydt beyns her-
zen vber die begangne missetat / also yn der Buß / offentlich
erzeygest / darauff den auch wir offentlich spüren deyn de-
muth / vnd das es dich genglich rewet / vnd Got der barm-
hertzige vater vns zugesagt hat / vorgebung der sünde durch
Ihesum Christ vnsern heyland ym heyligen Euangelio / wo
czween vnther euch eyns werden auff erden / war vns es ist /
das sie bitten wollen / das sol yhn widderfaren von meynem
vater / Dañ wo czween oder drey vorsamlet sein yn meynem
namen / do bin ich mitten vnther yhn / Item was yhr auff-
loset vfferden sol auffgeloset seyn ym hymel / Also sag ich
zu dir an Christus stadt sey getrost meyn tochter / deyn sund
sind dir vergeben / auch nehmen wir dich wider an / zu eynem
gelyd / des geystlichen leybs Christi / wilcher ist die gemeyn
der gleübigen / von welchem leyb du dich selbst hast abge-
sthnitten durch deyn laster / Das du dem selben seyst widder
eyngeleybt yn dem namen vnsern herren Ihesu Christi ꝛc.

Item So offte es sich begibt das der tag Annunciationis
Marie auff den nechsten Sontag vor Ostern odder dieselbi-
gen volgenden wochen oder auch yn den Ostertagen gefelt /
sol es den nechsten Sontag nach Ostern gehalten werden
nach alter gewonheit / dar mit man dieselben czeit das heylig
leyden vnd aufferstehung Christi vnuorhyndert bepredigen
müg.

Handwritten text in a cursive script, likely from a 17th or 18th-century manuscript. The text is arranged in several lines across the top half of the page.

Handwritten text in a cursive script, continuing from the top section. The text is arranged in several lines across the middle section of the page.

Handwritten text in a cursive script, located at the bottom of the page. The text is arranged in several lines.